

## Tutu Nì Tiaa San Pablo nùu Nèhivì xí Dios Ndoó Nuu Éfeso

<sup>1</sup> Yùhù nduí Pablo, iin ana nì nìhì chuun ì nùu Jesucristu, vèchi ducán nì chitnùní ini Dios guide. Te vichi tiaí carta yohó nùu nsidaa mii-nsiá nèhivì ì xí-yá ñuu Éfeso, nsidaa mii-nsiá nècuàchì iin-ni cahvi stná xì Jesucristu.

<sup>2</sup> Contentu ni cúndóo-nsiá quida Yua-nda Dios xì Stoho-ndà Jesucristu, te cuàhà gá gracia xi-ya ni cúcúmí-nsiá.

*Cuàhà gá cundiatú anima nsidaa nèhivì xì Jesús*

<sup>3</sup> Ansivéhé cahnú Yua-nda Dios, divi mii-yá ana cahvi stná Stoho-ndà Jesucristu, vèchi Yuamàni-yámà nduú-yá. Te sàhà-ñá nduu-nda nèhivì xí Dèhemanì-yá, ñàyùcàndùá sàni sàhatahvi-yándô nsidanicuú ñà-ndiaha ì iá ansivi.

<sup>4</sup> Te sàhà stná ñà-ndùá nì quida mii-yá, ñàyùcàndùá nì nacàxin Dios ndohó dècuèndè na táyô ñuhivì sàhà-ñá cundoo-nda nùu-yá, te cunduu-nda nèhivì ì còò falta xi.

<sup>5</sup> Te sàhà ñá-cùu guá ini-yà sàhà-ndà, ñàyùcàndùá nì chitnùní ini-yà sàà-ndà cunduu-nda dèhe ndisa-ya. Divi ñà-jaàn nduá nì nacani ini-yà, te sàhámà nì chitnùní ini-yà ñà-nìhitáhvi-ndà ducán sàhà (obra nì quida) Jesucristu.

<sup>6</sup> Te vichi tavá-nda tnùñuhu xí-yá ñà-ndiaha guá nì quida-ya nì sàhatahvi-yándô gracia, te sàhà gracia mà sàni nìhì-ndà nì cundiatú vaha anima-ndà nì quida Dèhemanì-yá.

<sup>7</sup> Vàchi sàhà-ñá nì xihì Dèhemanì-yá, te nì xitià nì-yá, ñàyùcànduá vátùni nì nacuidahan-yándô nùù tnùndoho, vachi nì ndutu cuàchi-nda ñà-nì quida guá-yà gracia sàhà-ndà;

<sup>8</sup> te sàhà gracia nì quida-ya mà, fuerte gà sàni dàtnùù-yà ini anima-ndà; ndiaha gà sàni nduhii sàxìnítnùní-ndà nì quida-ya.

<sup>9</sup> Tiempu antes nìsa ìa dèhé ñà-nduá nì nacani ini-yà quida-ya quivì vaxi xi-nda, doco vichi sàni cachitnùhu-ya xì-nda nansa iámà, nì cachi-yà nansa nì chitnùní ini-yà quida-ya,

<sup>10</sup> ñà-cunduu Cristu ana cusahnú nùù nsidan-icuú iñàha, ñà-ìá ansivi xì ñà-ìá stná ñuhivì. Te seguru icúmí cuu ndisa nsidaámà na sàà meru quivì xán.

<sup>11</sup> Sàhà-ñá nduu-nda nèhivì xí Cristu, ñàyùcànduá sàni nihitáhvi guá-ndà nùù Dios, vachi divi ñà-jaàn nduá nì nacani ini-yà antes. Te mii-yá, nacua chíttnùní ini-yà quida-ya, divi ducán siempre quidá ndisa stná-yà.

<sup>12</sup> Te nsiùhù nècuàchì primeru nì quìhvi ichì Cristu, ducán nì chitnuni ini-yà nihitáhvi gà-nsì sàhà-ñá chicá más tnùñuhu xí-yá quee sàhà ñà-ndiaha guá nì quida-ya xì-nsì.

<sup>13</sup> Daaní, después nì xinitnùhu stná mii-nsiá palabra ndàcuisì xí-yá, divi razón vaha nansa càcu-nda, te nì xinindisá stná-nsià Cristu. Ñàyùcànduá nì nihì stná-nsià Espíritu ìì xí-yá, nacua nì quida-ya comprometer. Te Espíritu ìì mà nduú nahi seña ñà-sàni nanduu-nda nèhivì ìì xí-yá.

<sup>14</sup> Doco cuisì-ní tnùmánì primeru nduú Espíritu ìì, vachi más gà icúmí-ndá nihitáhvi-ndà na

sáa quivì nacuaca-yàndó, vàchi nèhivì xí mii-yá nduu-nda ñà-sàni dànàá-yá sàhà-ndà. Te cuàhà gá stná tnùñuhu ndiaha xí-yá icúmí quee quivì (nìhitàhvi guá-ndà ducán).

*Nansa nì xicàn tàhvi Pablo nùu Dios ñà-nì cuáhatahvi-yá nèhivì xí-yá iin anima nchichí*

<sup>15</sup> Cunaha-nsiá, sàni xinitnùhi ñà-fuerte guá nihnú inì-nsia Stoho-ndà Jesús xì ñá-cuàhà guá cuú stná inì-nsia sàhà nsidaa nèhivì xí-yá. Ñàyùcàndùá,

<sup>16</sup> siempre naquímán' Dios sàhà-nsiá, te xicàn tàhvi nùu-yá

<sup>17</sup> ñà-nì ndúnychíhí ndiaha-nsiá quida Espíritu ñi; te ni chindéé stná-yà mii-nsiá mànhì inì-nsià sàhà Dios, dandu chicá cunaha váha-nsiayà. Divi ñà-jaàn nduá xicàn tàhvi nùu Yuandiaha-nda Dios, divi mii-yá ana cahvi stná Stoho-ndà Jesucristu.

<sup>18</sup> Daaní, xicàn tàhvi stnái nùu-yá ñà-nì dátñùu-yà sàxínítnùnì-nsià sàhà-ñá cundaà vaha inì-nsià nansa iá tnùndé ini ndiatu-nda nùu-yá, vàchi ñà-sàni cana-yàndó iá ndisa tnùndé ini xi-nda. Te xicàn tàhvi stnái ñà-nì sáa-nsià mànhì inì-nsià ñà-ndiaha guá sàni nìhitàhvi-ndà cuàhà ñà-vaha nùu-yá, nsidanicuú ndohó nèhivì ñi xí-yá.

<sup>19</sup> Te xicàn tàhvi stnái ñà-nì cúndàa inì-nsià ñà-cuàhà guá poder ndiaha icúmí-yá, te vátùni nacuàhandee ini-yà ndohó nècuàhì xiníndísá-xí-yá. Te divi sàhà poder ndiaha ma

<sup>20</sup> nì dànátíacú-yà (Dèhemanì-yá) Cristu, dandu nì nsihi nì natiacu-yà nì nana-ya ansivi dècuèndè gloria, te nì sàcòo-ya ladu cuahá Yua-nda Dios.

<sup>21</sup> Te vichi dìquì-xí iá-yà, te cuàhà gá más ndiaá-yà nùù nsidaa ana cusáhnû, xì nùù nsidaa ana itá fuerte, xì nùù nsidaa ana icúmí xí poder, xì nùù nsidaa ana dândacú, xì nùù nsidanicuú gá stná ana ndácùcahan nèhivì tiempu vichi, te ò tiempu vaxi xi-nda inga ñuhíví.

<sup>22</sup> Nsidanicuú iñàha, sàni ndòa sujetu nùù Cristu nì quida Yua-nda Dios. Te nsidaa ndohó nèhivì iin-ni cahvi xi-yá, sàni chitnùnì ini-yà dandacú Cristu nùù-ndà na ian dândacú dìni-ndà nùù-ndà.

<sup>23</sup> Te ndohó, nahi iquicúñú mii-yá nduú stná-ndà. Te sàhà ndohó na ian sàni sacatnahá nsihi cuerpu xi-ya, na ian iá nsihi-ya vichi. Te mii-yá nduú ana iá inicutu ñuhíví xì ansivi.

## 2

### *Nansa cuú ini Dios sàhà-ndà, te nì dácacu-yàndó*

<sup>1</sup> Vichi sà-itiácú ndisa anima-nsià. Doco antes na ian còò vida xì anima-nsià nì sá-ia nùù-yá ñà-cuàhà guá cuàchi-nsià;

<sup>2</sup> vàchi nìsa cudìi inì-nsia quida-nsia falta nahi nsidaa gá nèhivì ñuhíví. Nìsa inini-nsia tàchì malu cusáhnû nùù nsidaa gá ñà-malu xicá ansivi, te divi quisi jaàn dacáhàn xì nsidaa nèhivì có-inínì xí Dios.

<sup>3</sup> Daaní, stná nsiùhù, nìsa xicanuu stná-nsi cutnàhâ-nsí xì nècuàchì có-quidá víi ma; vàchi nsidaa-nda, nacua nìsa xicàn ini cuerpu xi-nda xì sàxínitnùnì-ndà, ducán nìsa cudìi ini-ndà quida-nda. Ñàyùcànduá, cuàhà gá castigu xi Dios nì càyà sàhà cuàchi-nda, nacua cáyâ-ñà sàhà nsidaa gá stná nèhivì cuáchi.

<sup>4</sup> Doco Dios, cuàhà sàstnùhù cuhí ini-yàndó; vàchi yáha ga cuú ini-yà sàhà-ndà;

<sup>5</sup> ñàyùcàndùá, nì quida-ya gracia sàhà-ndà, te nì dàcácu-yàndó. Mate còò vida ndiaha nùù anima-ndà sàhà cuàchi nì quida-nda, doco nì quida-ya cuenta na ian nì natiacu stná-ndà na ní natiacu Cristu.

<sup>6</sup> Ñàyùcàndùá, ducán iá na ian nì cutnaha-nda xi-yá na ní natiacu-yà nì quida Yua-nda Dios. Te quidá stná-yà cuenta na ian sàni nana stná-ndà ndè gloria, te vichi cutnaha-nda xi Jesucristu ndoo-nda yucán xi-yá nì quida Yua-nda Dios.

<sup>7</sup> Pues ñà-jaàn sàni quida-ya sàhà-ñá nicanicuahàn ni queé cuàhà tnùñuhu xí-yá sàhà gracia nì quida-ya na ní indehè ndahví-yàndó sàhà Jesucristu;

<sup>8</sup> Vàchi micuísì gracia nduá sàni càcu-nda ñàni xinindisa-ndayá. Màdi iin chuun ni quidá ndohó nduá nì càcu-nda, còò. Ñà-ndùá nì cutahví-ndà nùù Dios nduá.

<sup>9</sup> Ni màdi obra vaha ni quida-nda nduá nì dácácu xi-nda. Còò, còtó sàè iin-nda cucahan-nda chicá ndiaá-ndà.

<sup>10</sup> Còò, mii-yá nì quida-ya obra xì ndohó, te sàhájàn sàni ndusaa anima-ndà. Vàchi na ní sàcùndoo-nda nùù Jesucristu nì ndusaa íní-ndà sàhà-ñá cui quida stná-ndà cuàhà obra vaha nacua nì chitnùní ini-yà quida-nda.

*Nsidaa nèhivì xí Jesús, iin-ni nèhivì xínduu-ne*

<sup>11</sup> Ñàyùcàndùá, xiñuhu nsinuu ini nsidaa mii-nsiá nècuàchì inga raza, vachi có-nduú-nsiá nèhivì raza Judea. Nèhivì còò seña xi Dios ìcà-xí cachí nsiùhù nècuàchì raza mà xì mii-nsiá; te nèhivì seña xi Dios cachí-nsì xì mii-nsí, vachi iá iin

seña nì chituu nèhivì ìcà-nsí. Ñàyùcàndùá xiñuhu nsinuu ini-nsià nansa nìsa ìa xi-nsiá antes,

<sup>12</sup> cónisá níhnú inì-nsia Cristu antes, mànicùì (nìhìtáhvi-nsiá) nahi nèhivì ñuu-nsì Israel, te cónisá ínáhá stná-nsià ni-íñaha sàhà tratu nì saquin-yà, te nì quida-ya comprometer cuàhà gá ñà-ndiaha. Còò nì-iin tnùndé ini nìsá ícúmí-nsiá, ni còò stná Dios nìsá ìa nùù-nsiá.

<sup>13</sup> Xica nìsa ìa-ya nùù-nsiá antes, doco vichi sàhà-ñá (nì xihì) Cristu, te nì xitià nùù-yá, ñàyùcàndùá vátùnì sàni tnàtuu yatni-nsia nùù-yá nduá, vàchi divi Jesucristu sàni xinindisá stná-nsià.

<sup>14</sup> ùi raza nì sanduu-nda antes, na ian nì tàhndè dava-nda; doco vichi sàni nacuatnaha-nda nì quida-ya; iin-ni nì nàcùnduu-nda quidá-yá cuenta vichi, te ía paz, có-xinì ùhì stnahá gá-ndà.

<sup>15</sup> Cunaha-nsiá, sàhà-ñá nì nanduu-ya nèhivì, (te nì xihì-yà), ñàyùcàndùá nì nìhì-yá nì nacadi-yà ichì ley sàna. Cuàhà gá nìsa dandacú ley mà nùù-ndà, cuàhà gá nìsa xicàn-ñà quida-nda, doco nsidaámà, sàni cuxicá nì quida-ya, te vichi iin-ni nèhivì saa sàni nanduu-nda, có-nduú gá-ndà ùi raza, ñàyùcàndùá, sà-ìá paz.

<sup>16</sup> Vàchi na ní xihì-yà nchìca cruz, nì nìhì-yá nì nàcùndoo vaha nduì raza-ndà xì Dios, te nì nìhì stná-yà nì nachindoo vaha-yàndó, có-xinì ùhì tnahá gá-ndà vichi. Vàchi iin-ni nèhivì sàni nanduu nsidaa-nda nì quida-ya.

<sup>17</sup> Na ní quixi Cristu, nihí-yá iin razón ndiaha nì quesaa, te nì cachitnùhu-ya nansa coo paz nùù nsidaa-nda. Mii-nsiá, mate xica nìsa ìa Dios nùù-nsiá, doco nì sàà stná palabra mà nùù-nsiá. Daaní,

nsiùhù, na ian yatni nùù ichì-yá nì sandoo-nsi, te nì sàà stná palabra mà nùù-nsí.

18 Vàchi sàhà Jesucristu sàni nìhìndèè ndúì raza-ndà tnàtuu-nda nùù Yua-nda Dios. Te iá stná imindaa Espíritu Ìì xí-yá, te chindee stná-yàmà ñà-tnàtuu-nda nùù-yá.

19 Mii-nsiá, có-ndùú gá-nsià nahi nèhivì xio, ò nèhivì fuera, còó. Meru nèhivì ìì xí ñuu Dios nduú stná-nsià vichi nahi nsiùhù. Dècuèndè nduú stná-nsià nahi nèhivì ndoó vehe-ya.

20 Te ndisa, na iin vehe nduú stná-ndà. Te nahi cimientu xan nduú apóstol xì nsidaa stná profeta nìsa cahàn cuenta xì-ya. Te nahi cavà cahnú indúhu esquina cimientu, ducán nduú Jesucristu.

21 Ñàyùcàndùá, base xi-nda nduú-yá, te na ian cueé-ni cueé-ni cudúcùn iin vehe na cuáha-ña, ducán stná ndohó, (cueé-ni cueé-ni nacuatnàhá-ndá) dècuèndè sàà-ndà cunduu ndisa-nda na iin veheñùhu ìì xí Stoho-ndà Señor.

22 Te mii-nsiá, sàhà-ñá nchícùn stná-nsià mii-yá, vátùni sàni nacuatnàhá stná-nsià (xì nsiùhù), te ducán sàà nsidaa-nda cunduu-nda na iin vehe-ya ndé coo-ya nicanicuahàn sàhà Espíritu Ìì xí-yá.

### 3

*Nansa iá chuun xi Pablo ñà-cachitnùhu-ne palabra ìì xì nèhivì inga raza*

1 Yùhù Pablo, ndiadí vehecàa vichi sàhà-ñá (quidé chuun ìì xí) Jesucristu. Te chuun ìì mà, sàhà ñà-vàha xi stná mii-nsià nècuàchì inga raza nduú stná.

<sup>2</sup> Ádi sá-ínáhá-nsiâ nansa nì quida Dios gracia sàhí, te nì ñhítáhvì quide chuun (chinàhì) mii-nsiá.

<sup>3</sup> Vàchi mii-yá, nì dàtnúù-yà sàxínítnùnì yùhù nansa iá palabra ndiaha ñsa ìa dèhé antes. Te divi sàhámà nì tiai iin carta tii (nì sàà nùù-nsiá) daa.

<sup>4-5</sup> Ñàyùcàndùá, nú sàni cahvi-nsia carta mà, dandu vátùni cundaà ini-nsià nansa nì ñhítáhvì mànhì inì palabra sàhà Cristu ñsa ìa dèhé antes. Cunaha-nsiá, cóni ñhítáhvì nèhivì sànaha cunitnùhu-ne palabra mà; doco vichi sàni dàtnúù Espíritu ìi sàxínítnùnì nsiùhù nècuàchì apóstol xi-ya, xì stná nècuàchì dava ga cáhàn cuenta xi-ya.

<sup>6</sup> Te divi ñà-yòhó nduú (palabra mà): ñà-vátùni ñhítáhvì stná nèhivì inga ñuu nú ni cúníndísâ-né palabra xi-ya, mate có-nduú-né nècuàchì raza-nsì Judea. Nahi iin-ni nèhivì cunduu ndúì raza mà. Ñàyùcàndùá, vátùni ñhítáhvì nècuàchì inga raza ñà-ndiaha ìi nì quida-ya comprometer, vachi nèhivì xí Cristu cunduu stná-nè.

<sup>7</sup> Cunaha-nsiá, nì quida Dios gracia sàhí nì sàhatahvì-yá yùhù chuun ñà-cachitnùhi palabra ìi xí-yá; te sàhà poder ndiaha xí-yá (nì cana-ya yùhù),

<sup>8</sup> mate nduí iin ana chicá có-ndiàá nùù nsidaa nèhivì xí-yá, doco nì ñhí (chuun) ndiaha nùù-yá, divi ñà-cachitnùhi xì nèhivì nsidaa ñuu ñà-ndiaha guá iá ñà-nduá sàhatahvì Cristu ndohó.

<sup>9</sup> Te nì ñhì stnáì chuun datúi nùù nsidaa nèhivì nansa nì chitnùnì ini Dios quida-ya. Dècuèndè chicá sànaha ñsa ìa dèhámà, cuisì Dios ñsa inaha xán; iin-ni ndè antes nì quidavàha-ya ñuhivì ináhá-yâñà.



10 Doco vichi sàni dàtúi-ya nsidaámà sàhà-ñá ndulocó nsidaa ángel xi-ya xì nsidaa stná espíritu xicá ansivi, na indéhe-né ñà-ndiaha guá quidá-yá xì nèhivì càhvì xi-yá, dandu cundaà vaha ini-nè nchichí cuàhà-yá sàhà nsidaa chuun quidá-yá.

11 Pues dècuèndè nicanicuahàn antes, ñà-jaàn nduá nì nacani ini-yà quida-ya, te divi ñà-jaàn nì nihì stná-yà nì dàxínu-ya na ní quida Stoho-ndà Jesucristu (obra xi-ya).

12 Te vichi nuná ñuhivì nùù-ndà, vètùni tnàtuu-nda nùù Dios, mà yúhì gà-ndà, vèchi xiníndísá-ndá Jesucristu.

13 Ñàyücànduá, yùhù sacúndáhvì nùù-nsiá nà-màsà cúhúún ini-nsià sàhà ñà-cuàhà guá ndohí sàhà mii-nsiá (nècuàchì inga ñuu); còò, vèchi xiñuhu quida-nsia cuenta na ian tnùñuhu xí-nsiá nduá.

### *Cuàhà sàstnùhù cuú ini Jesucristu sàhà-ndà*

14-15 Cunaha-nsiá, nsidaa ñà-jaàn nduá dísàhà-xí cuàhìn càcàn tàhvì nùù Yua-nda Dios vichi. Siempre sàcuèin sísì nùù-yá, te cachì xi-yá Yua-nda Dios, vèchi mii-yá nduú yua nsidaa ndohó nècuàchì ndoó nùù-yá, a sea ndoo-nda ñuhivì yohó, te ò ansivi ndoo-nda.

16 Pues vichi xícàn tàhvì nùù-yá ñà-nì nácuàhandee ini Espíritu ìlì xí Dios mii-nsiá, vèchi cuàhà gá poder ndiaha icúmí-yâ.

17 Te xícàn tàhvì stnái nùù-yá ñà-nicanicuahàn ni cúníhnú vaha inì-nsia Cristu, te ducán coo-ya contentu ini anima-nsià. Te xícàn tàhvì stnái nùù-yá ñà-nì cuú fuerte ndisa ini-nsià sàhà-yá xì sàhà stná ñanìtnaha-nsia na ian iín fuerte iin yutnù ducún, te ò indúhu fuerte iin vehe cahnú.

18-19 Te nú ducán, dandu vátùni mànihì váha ini-nsià ñà-cuàhà guá cuú ini Cristu sàhà-ndà. Te divi ducán xícàn tàhvì stnái sàhà nsidaa gá nèhivì xí-yá, ñà-nì sáa nsidaa-nda mànihì ini-ndà ñà-yáha guá cuàhà cuú ini-yà sàhà nsidaa-nda, ndéni ana nì cui ni cúndúú-ndá, te ndéni nì cui ni cúndóó-ndá. Doco còó, ni mà cùi sàà-ndà cundaà nsihi ini-ndà sàhájàn, doco siquiera xícàn tàhvì ñà-chicá más ni cúndàà ini-nsià sàhà-ñá, te ducán sàà anima-nsià nachituá mii Dios.

20 Te vichi ansivéhé Dios, vátùni quida-ya nsidanicuú ñà-nduá xícàn tàhvì-ndà nùù-yá, dècuèndè yáha ga más cui quida-ya nùájàn, mate iin chuun cahnú sàstnùhù nduá ni cúníhnú ini-ndà càcàn-ndà, doco (vátùni ñihì-ndáñá), vàchi cahnú poder xi-ya, te divi poder mà quidáchúùn stná ini anima-ndà.

21 ¡Ansivéhé cahnú-yá! Nicanicuahàn xiñuhu naquimani-ndáyá sàhà ñà-ndiaha guá iá Jesu-cristu xì ñà-ndiaha guá quidá stná-yà xì nsidaa ndohó nèhivì cahvi xi-yá. Te dècuèndè nicanicuahàn ducanicoó. Amén.

## 4

*Iin-ni nèhivì sàni nanduu-nda ni quida Espíritu Ìi xí Dios*

1 Sàhà-ñá nchícuìn Stoho-ndà Señor ié` vehecàa yohó. Ñàyúcànduá sacúndáhvì` nùù-nsiá ñà-nì càcánúú víi stná-nsià nacua ndiá icà-ndà, vàchi sàni cana-yàndó (ñà-cunduu-nda nèhivì Ìi xí-yá).

2 Sàhà ñà-jaàn xiñuhu cunihnu ndahvi ini-ndà, te cunihnu manì stná ini-ndà. Iin-ni ni quidándéé cahnú ini-ndà sàhà ñanìtnaha-nda. Calma ni cúndóó-ndá. Iin-ni ni cúcúú ini-ndà sàhà-né.

<sup>3</sup> Vàchi nahi iin-ni nèhivì xínduu-nda nì quida Espíritu Ìì xí-yá; ñàyùcàndùá, iin-ni ni cúndóó màni nsidaa-nda, vâchi chindéâmà ñà-màsà táhndè dava-nda.

<sup>4</sup> Vâchi nahi iin-ni cuerpu mii-ya (nduú nsidaa-nda), te imindaa Espíritu Ìì xí-yá íá stná, te iin-ni tnùndé ini ndiatú stná nsidaa-nda ñà-sàni cana-yàndó.

<sup>5</sup> Te imindaa Stoho-ndà Señor íá stná, xì imindaa stná ñà-ndùá xiníndísá-ndá. Daaní, iin-ni sàni cuhì stná nsidaa-nda.

<sup>6</sup> Vâchi imindaa Dios íá, te Yua nsidanicuu-nda nduú-yá, vâchi cusáhnû-yá nùù nsidaa-nda, te chindéé-yá nsidaa-nda, te íá stná-yà ini anima nsidaa-nda.

<sup>7</sup> Doco cada iin iin-nda sàni nìhítáhvì-ndà nùù Cristu según nansa nì cudìi ini mii-yá cuàhatahvì-yàndô.

<sup>8</sup> Ñàyùcàndùá, dohó cachí nùù tutu ìì:

Sàni nana-ya ndè gloria, ndacá stná-yà cuàhà gá ana nì cundee-yá nùù-xí, dandu nì sàhatahvì stná-yà nèhivì ñuhiví cuàhà ñà-vàha.

<sup>9</sup> Pues cachí tutu mà ñà-nì nana-ya (ansivi), doco ¿ndià nduá cuní cachàmà? Dohó cuní cachà, ñà-antes nì nuu-ya ndè tixi ñuhù ndé chicá cunú.

<sup>10</sup> Daaní, después nì nana stná-yà ansivi ndé chicá ducún sàhà-ñá nachitu inicutu ñuhiví poder xi-ya.

<sup>11</sup> Te nì sàhatahvì stná-yà nèhivì cuàhà ñà-ndiaha. Dava-nsi nì nìhítáhvì-nsí cunduu-nsi apóstol cacanu-nsi chuun xi-yá. Te dava-nda nì nìhítáhvì-ndà cunduu-nda profeta cáhàn razón quixí nùù-yá. Te dava ga-ndà nì nìhítáhvì-ndà

cunduu-nda ana tùha viì cachitnùhu xì nèhivì nansa càcu anima-nè. Te dava stná-ndà nì nìhitàhvi-ndà cunuù-ndà nèhivì xí mii-yá, te chinaha stná-ndané.

<sup>12</sup> (Ducán nì chitnùnì ini-yà nìhitàhvi iin iin-nda) sàhà-ñá cui chindee stnaha-nda, te sahájàn nìhì stná-ndà cunucuachi víi-nda nùù-yá, dandu nacuahandee stná ini nsidaa-nda na ian cuàhàn ndufuerté cuerpu xi mii Dèhemanì-yá Cristu.

<sup>13</sup> Ducán dandu vètuni sàà nsidaa-nda cunindisá víi-nda palabra xi-ya, te cunaha ndisa-nda Dèhemanì-yá. (Te ndiaha gá ñà-jaàn), vèchi nú ducán, dandu nàcùnihu ini-ndà nahi iin nèhivì sahnú, te ini stná anima-ndà cuacatnahá stná nsidaa gracia xi Dèhemanì-yá Cristu.

<sup>14</sup> Mà cúndúú gá-ndà nahi mée; (mà cúníndísá-ndá) nansa ni nì cui ñà-ndúá chináhá nèhivì. (Mà tucù nahá-ndà inga ichì) na ian dandiachi tàchì-ndó yohó te yucán. Ni mà nìhì stná nèhivì maña dandahví-nèndó, mate cunì-nè datúcù-nèndó iin ichì có-ndúú ñà-ndáa.

<sup>15</sup> Ñàyùcàndúá, sàhà-ñá màsà cúú xí-ndá ducán, xiñuhu ni cáhàn-ndà puru ñà-ndácuìsì xì ñanìtnaha-nda. Màni màni nì cáhàn-ndà xì-né, dandu sàà-ndà quida sahnù-nda nacua cunì Cristu, vèchi mii-yá, nahi ònì-ndà (dandacu-xi nùù-ndà), ducán nduú-yá.

<sup>16</sup> Te ndohó, nahi ndahàsáhà-yá nduu-nda, vèchi iin-nì sàni nacuatnahá nsidanicuu-nda nì quida-ya sàhà-ñá nì chíndéé stnaha-nda, te cunduu-nda nahi iin-nì cuerpu xi-ya. Vèchi chuun xi mii-yá nduá dandacú-yá, te chuun xi ndohó nduá ñà-quida-nda chuun nì quida tocar iin iin-nda. Ñàyùcàndúá, ducán queé stná mà na ian sahnú

cuerpu xi-ya, te ndufuértêà, dandu chicá (ndiaha gá) cucuu stnahá stná ini-ndà sàhà-ndà.

*Nansa ndiá icà-ndà quida-nda ñà-sàni ñìhitáhvi-ndà vida ndiaha nùù Jesucristu*

<sup>17</sup> Ñàyùcàndùá, yùhù ndácùcahín Jesucristu, te chináhí mii-nsiá ñà-màsà quidá gá-nsià na quidá nèhivì có-ìnáhá xí Dios, vèchi cuisì ñà-chìcuéhè ñìhnú ini-nè.

<sup>18</sup> Có-dàtnùù Dios sàxìnítnùní-nè. Còò vida ndiaha xí mii-yá nùù-né, vèchi có-cùndáà tnùní ini-nè sàhà-yá ñà-caxin guá anima-nè.

<sup>19</sup> Mà túha-ne cucahan nùù-né, mate cuàhà gá viciu icúmí-nê, vèchi ñà-diì xí-né nduá quidá sìquinì-né.

<sup>20</sup> Doco mii-nsiá, còó. Tucu iá ichì Jesucristu ñì dàcuàhá-nsiá.

<sup>21</sup> Te (a sácú vaha) nú sàni sàà-nsià ñì cundaà vaha ndisa inì-nsia sàhà-yá, te (a sácú vaha) nú sàni chinaha-yà mii-nsiá nacua nduú ñà-ndácuisì sàhà-yá.

<sup>22</sup> Te dohó cachí palabra xi-ya, (ñà-có-ìá vaha) ñà-nduá ñisa quida-nda antes. Xiñuhu nacoo dahuun-nda modo ñisa nihnu ini-ndà, vèchi ñà-yùcán cuàhàn dandáñúhú xí-ndá ni cuí. Cutu dandahviándó, te daxíhoándô cuàhà ñà-sìquini.

<sup>23</sup> Ñàyùcàndùá vichi xiñuhu nacani ini-ndà iin modo saa,

<sup>24</sup> te quida-nda cuenta na ian sàni ndusaa-nda, na ian làcà ñì quidavaha Dios ndohó, vèchi vichi sàni sàhatahvi-yándô ñà-cunduu-nda nahi mii-yá, vètùni quida-nda nacua cachí palabra ndàcuisì ndé cachí-yà xì-ndà ñà-cunihnu ñì ini-ndà, te quida vii-ndà xì ñànítnaha-nda.

25 Ñàyùcàndùá, ni-iin xichi màsà dándáhvi stnàhá gá-ndà. Micuísì palabra ndàcuisì ni cáhàn-ndà xì ñanìtnaha-nda, vàchi iin-ni nèhivì xínduu nsidaa-nda vichi.

26 Te nú ni cuídà ini-ndà sàhà iñàha, cuidadu ni cúndóó-ndá ñà-màsà quidá-ndá iin cuàchi; màsà cuídà ini-ndà inii ndui yacá.

27 Màsà cuáha-nda lugar dacà ñà-malu sàxìnínùnì-ndà.

28 Nú nìsa xidacuihna-nda antes, màsà quidá gá-ndà ducán. Iin chuun viì ni quidáchúún-ndá vichi, dandu cucumi-nda iñàha xì mii-nda, te cui dacútáhvi-ndà nèhivì iá necesidad-xi.

29 Daaní, màsà cáhàn quini stná-ndà vichi. Còó, puru palabra viì ni cúndúá, cundaca xi anima-ndà, dandu ndiaha gá chindeá nècuàchì inínì na cáhàn-ndà.

30 Te màsà dácùhúún stná ini-ndà Espíritu Ìì xí Dios, vàchi mii-yá nduú seña ñà-nduù-ndà nèhivì ìì xí-yá, te iin-ni cucumi-ndayá dècuèndè quivì càcu dahuun-nda.

31 Màsà chùhún gà ini-ndà sàhà iñàha. Te màsà cuídà gà stná ini-ndà. Ni màsà ndúdáná-ndá; còó. Ni màsà cánàhá stná-ndà, te màsà cáhàn quini ga stná-ndà. Ni màsà cúndéhe úhì stnahá stná-ndà.

32 Còó, màni ni cúndóó-ndá xì ñanìtnaha-nda, te cuhi stnàhá stná ini-ndà. Te nsidaa-nda xiñuhu cuicahnú stnahá ini-ndà sàhà-ndà nacua nì quida Yua-nda Dios xì ndohó (ñà-nì xìhì) Cristu sàhà-ndà.

## 5

1 Ñàyùcàndùá, na ian quidá Dios, ducan ni quidá stná-ndà, vàchi dèhe-ya nduu-nda, te màni

cuáhà-ndà nùù-yá.

<sup>2</sup> Iin-ni ni cúcúú stnahá ini-ndà sàhà-ndà nacua cuú stná ini Cristu sàhà ndohó, vèchi sàhámà nì sàha-ya vida xi-ya cuenta xi-nda, te ducán nì nìhì-ndà nì cudìi ini Yua-nda Dios sàhà-ndà.

<sup>3</sup> Nèhivì xí mii-yá nduu-nda vichi, ñàyùcàndùá, màsà càhàn-ndà xi ana cónì nándàhà xì-ndà; màsà quidá sìquini-ndà, nì màsà xího-nda ñà-ndùá icúmí inga nèhivì. Còó. Ni màsà ndácùcahan ga stná-ndà ni-iin chuun sì-quini mà, vèchi nèhivì ìì xí mii-yá nduu-nda vichi.

<sup>4</sup> Na càhàn-ndà, màsà càhàn-ndà palabra sìquini, ò palabra chicuèhè, nì màsà cuácùndiaa stnaha-nda. Còó, mà váha càhàn-ndà ducán. Lugar xi ñà-jaàn xiñuhu naquimanì-ndà Dios.

<sup>5</sup> Vèchi ináhà-ndá, mà cácu ni-iin nèhivì có-quidá sahnú xi nècuàchì ñahà; mà cácu ni-iin nèhivì sìquini, ni-iin stná ana xího cucumi cuàhà iñàha, vèchi nèhivì xího guá ducán, queámà na ian cahvi-né ñà-jaàn. Pues ni-iin nèhivì quidá ducán, mà níhìtáhvi-né ñuhivì ìì xí Cristu, divì nduú ñuhivì ìì xí Dios.

<sup>6</sup> Nú dacàhàn nèhivì-nsiá ñà-quida-nsia ñà-có-ndiàá mà, màsà cuàha-nsia dandahví-nè mii-nsiá, vèchi icúmí Dios dandohó-yá nsidaa nèhivì có-íníni xí-yá, te quidá-né ñà-chìcuèhè (sàni cachì mà).

<sup>7</sup> Ñàyùcàndùá, màsà quíhvi tnahá-nsiá xì nèhivì quidá ducán.

*Nansa ndiá icà-ndà quida-nda ñà-sàni dàtnúù Dios sàxìnítnùní-ndà*

<sup>8</sup> Ichì ñáa nduá nì sanchicùn-ndà antes, doco vichi sàni dàtnúù Stoho-ndà Señor

sàxìnítnùní-ndà, ñàyùcàndùá, xiñuhu cacanu  
vii-ndà vichi.

<sup>9</sup> Vàchi nú ndisa datnúù ndiaha-yá ini-ndà,  
dandu cunduu-nda nèhivì vaha ini-xi nihnú  
ndàcuisì inì-xi, te cunchicùn vii stná-ndà palabra  
ndàcuisì.

<sup>10</sup> Nsidaa ñà-ndùá quidà-ndà, xiñuhu nacani  
ini-ndà a cudû ini Stoho-ndà Señor sàhà-ñá, á coó.

<sup>11</sup> Màsà quíhvi tnahà-nda xi nèhivì có-quidá  
víi, vàchi ichì ñáa xicá-né. Còó, vihi gá vaha  
dahíhî-ndané.

<sup>12</sup> Vàchi ndóo cahan stná-ndà nú ndatnúhú-né  
sàhà chuun sìquini quidá dèhé-nè.

<sup>13</sup> Doco nú ni dáhîhî-ndané dandu queámà  
na ian datnúù-ndà iin luz nùù chuun quidá-né  
sàhà-ñá cunahà xicà nansa iá chuun ma. Vàchi  
claru náhà nsidaa iñàhà nú tnùù nihni iin luz nùá.

<sup>14</sup> Ñàyùcàndùá, ducán cachí (dichu):  
Ndacòo mii-ní nècuàchì quidì jaàn, te nsicuìhnú  
inì-ní, na ian natiacù-ní, dandu datnúù ndi-  
aha Cristu nùù-ní, cachá`.

<sup>15</sup> Ñàyùcàndùá, xiñuhu nacani vaha ini-ndà  
nansa quida-nda mientras ndoo-nda ñuhivì yohó.  
Màsà cacánúú-ndá nahi nèhivì có-cùndàà inì-xi; ni  
cúníhnú sahnú ini-ndà.

<sup>16</sup> Te nú iá nansa quida-nda (iin chuun vii), yàchì  
ni nácání ini-ndà quida-ndañá, vàchi ndoó cuàhà  
gá nèhivì có-quidá víi tiempu vichi.

<sup>17</sup> Ñàyùcàndùá, màsà quidá-ndá nahi nèhivì  
neciù; cuàhà gá xiñuhu mànhì ini-ndà nansa divi  
cuní Stoho-ndà Señor quida-nda.

<sup>18</sup> Ni màsà cóhó-ndá vinu, te xìni-nda, vàchi  
escándalo nduámà. Còó, fuerte ni coó Espíritu ìì xí  
Dios ini anima-ndà, chicá vaha.



19 Te na cáhàn-ndà ndatnúhú-ndá iin-nda xi inga-ndà, dandu coto stná-ndà salmu nacuatú-nda alabanza xi Stoho-ndà Señor xi alabanza datnúù Espíritu Ìì xí-yá sàxìnítnùnì-ndà. Nsidaa modo yohó coto-nda, te ndenihi vaha-nda mii-yá xi nsidaa anima-ndà.

20 Nicanicuahàn xiñuhu ndacùcahan-nda Stoho-ndà Jesucristu, te naquimani-ndà Yua-nda Dios sàhà nsidanicuú iñàha.

*Nansa xiñuhu quida-nda xi nèhivì vehe-nda*

21 Nsidaa-nda, xiñuhu cahvi stnaha-nda iin-nda xi inga-ndà, vachi nsidaa-nda, iin-ni cahvi stná-ndà mii-yá.

22 Mii-nsiá nècuàchì ñahà, xiñuhu cahvi-nsiá ì-nsiá na ian quidà-ndà xi Stoho-ndà Cristu.

23 Vachi nacua dandacú mii-yá nùù nèhivì càhvì xí-yá, ducán dandacú stná iin nècuàchì tiàa nùù ñahàdìhí-nè. Vachi divi Cristu nduú ana nì dàcácu xi ndohó nèhivì xí-yá, te nahi cuerpu xi-ya nduú stná-ndà.

24 Ñàyùcàndùá, nacua inínì-ndá mii-yá, ducán xiñuhu cunini stná nècuàchì ñahà nsidaa ñà-ndùá cachí ì-né.

25 Daaní, mii-nsiá nècuàchì tiàa, icúmí-nsiá cuu ini-nsiá sàhà ñahàdìhí-nsiá nacua quidá Cristu xi nsidaa ndohó nèhivì càhvì xí-yá. Vachi nì sàha-ya vida xi-ya cuenta xi-nda

26 sàhà-ñá nduhìì ini-ndà, te ndoo cuàchi iá an-ima-ndà quida palabra ìì xí-yá, na ian nì ndoa xi tècuíí.

27 Daaní, quìvì cana-yàndó, vátùni sàà-ndà nùù-yá, te ndiaha gá cundoo-nda. Mà cóo gá ni-iin mancha anima-ndà, ni iin xaan ndé iá chicuéhè;

còo ni-iñàha, vàchi nèhivì ìì xí-yá cunduu-nda. Mà cóo gá ni-iin falta xi-nda nùù-yá.

<sup>28</sup> Cunaha-nsiá, nacua cuú ini iin nècuàchì tiàa sàhà mii-né, ducán xiñuhu cuu stná ini-nè sàhà ñahàdihí-nè. Te nú ducán ni cuú ini-nè sàhà nècuàchìmà, dandu queámà na ian cuú stná ini-nè sàhà mii-né.

<sup>29</sup> Te ináhá-ndá, còo ni-iin nèhivì cahíchì ini xì mii-xí. Còó, de por sí dacuxi-nda mii-nda, te ndiaá-ndà mii-nda. Te divi ducán quidá stná Stoho-ndà Señor xì nsidaa ndohó nècuàchì càhvì xì-yá.

<sup>30</sup> Vàchi nahi iquìcúñú mii-yá nduu-nda.

<sup>31</sup> Te divi ñà-jaàn nduú stná ñà-dìsáhà-xí nándàhà iin nècuàchì tiàa xì iin nècuàchì ñahà, te quecuáân-né nùù yuadíhí-né. Ñàyùcàndùá, mate diín diín nì sanduu-ne antes, doco vichi na iin-ni nèhivì sàni nanduu-ne. (Ducán cachí tutu ìì.)

<sup>32</sup> Te mate ùhì cundaà nsihi ini-ndà sàhà palabra ndiaha ma, doco cunaha-nsiá, sàhà stná Cristu cáhàn, xì sàhà stná ndohó nèhivì càhvì xì-yá.

<sup>33</sup> Doco de todos modos, xiñuhu cuu ini nècuàchì tiàa sàhà ñahàdihí-nè nacua cuú ini-nè sàhà mii-né. Te nècuàchì ñahà, xiñuhu cahvi vìì stná-nè ìì-né.

## 6

*Nansa ndiá icà quida nècuàchì cuàtì xì stná nècuàchì cuàchì*

<sup>1</sup> Daaní, nsiohó nècuàchì cuàtì xì nècuàchì cuàchì, cunini-ndá yuadíhí-ndâ, vàchi ñà-jaàn nduú ñà-ìá vìì nùù Stoho-ndà Señor.

<sup>2-3</sup> Nì cóo tnùñuhu xí-ndâ nùù yuadíhí-ndâ, dandu yàha vàha-ndá; caní cuà cundoo naha-ndá ñuhiví. Cunaha-ndá, ley jaàn nduú ñà-primeru

nì cachi Dios ñà-cutahvì-ndà iin ñà-vàha (nú ni chívàha-ndañá).

<sup>4</sup> Daaní, mii-nsiá nècuàchì tiàa xínduu yua, màsà dácuìdà uun inì-nsia dèhe-nsia; xiñuhu dacuahnú víi-nsiáñà. Conseju viì ni cuáha-nsia, te chinaha vii-nsiáñà nacua cuní Stoho-ndà Señor.

*Nansa xiñuhu quida peón ndoó saín nùù lamú xi*

<sup>5</sup> Daaní, mii-nsiá nècuàchì xínduu peón, cunini vii-nsiá ñà-nduà dandacú lamú xi-nsia ñuhivì yohó. Quidañuhu-nsiánè, te cahvi víi-nsiánè. Iin-ni cunihnu vaha inì-nsia na ian Cristu nduú ana xinúcuáchí-nsiá nùù-xí.

<sup>6</sup> Doco màdiá cuisì na indéhe-né, dandu quidachuún víi-nsiá sàhà-ñá ndee vaha-nsia nùù-né; còó. Quidachuún-nsiá na ian Cristu nduú patrón quidáchúûn saín-nsiá nùù-xí; iin-ni ni cúníhnú ini-nsiá ñà-quida vii-nsiá nacua cuní Dios quida-nda.

<sup>7</sup> Na quidáchúûn-nsiá, ni coó vaha voluntad xi-nsia ñà-quida-nsia iin chuun viì, quida-nsia cuenta na ian Stoho-ndà Señor xinúcuáchí-nsiá nùù-xí, màdi nùù nèhivì ùûn.

<sup>8</sup> Vàchi ináhá-ndá, nùù mii-yá icúmí-ndá nìhì-ndà iin ñà-vàha xi-nda sàhà nsidanicuú chuun viì nì quida-nda, a ducán xínduu-nda nècuàchì libre, te ò nècuàchì ndoó saín nùù iin lamú.

<sup>9</sup> Daaní, mii-nsiá nècuàchì xínduu lamú, divi ducaní quida stná-nsiá xì ana nduú peón xi-nsia. Màsà cáhàn dana-nsia, vachi ináhá-ndá iá stná ana nduú Stoho-ndà, divi mii-yá iá ansivi, te (xiñuhu nsinuu ini-nsiá) ñà-nùù mii-yá iin-ni ndiaá nsidanicuú nèhivì.

*Ñà-nduá sáhatahvì Dios ndohó ñà-chindee xi-nda cundee-nda nùù ñà-malu*

<sup>10</sup> Imindaa iñàha iá gà cachì, ñàni: iin-ni ni cúníhnú fuerte ini-ndà Stoho-ndà Señor, te ducán nihi-ndà nacuahandee ini-ndà, vâchi yâha ga cahnú poder xi-ya.

<sup>11</sup> Cunaha-nsiá, cuàhà ñà-nduá nì chitnùní ini-yà cunduu nahi arma xi-nda ñà-chindee xi-nda sàhà-ñá màsà dáca ñà-malu-ndó, te dandahví-sindó.

<sup>12</sup> Vâchi màdi nèhivì ñuhivì yohó nduú ana náâ stnàhà xì-ndà. Còó. Divi ñà-malu náâ stnàhà xì-ndà. Cuàhà-sí, te fuerte-si, te ndoó stná ana xícusahnú nùù-sí. Cunaha-nsiá, divi ñà-malu nduú ana dandacu-xi nùù nsidaa nèhivì nchícùn ichì ñáa. Divi quisi sìquini xicánúú ansivi nduú-si.

<sup>13</sup> Ñâyùcànduá, ni cuíchúún-ndá nsidaa ñà-nduú arma nì chitnùní ini Dios chindee xi-nda na quivì cuní ñà-malu tnàtuu fuerte-si nùù-ndà. Daaní, nú sàni cundee-nda (nùù-sí), vâtùni cundoo fuerte ìi-ndà.

<sup>14</sup> Sàhà ñà-jaàn iin-ni ni cúníhnú fuerte ini-ndà. (Cuisì ñà-ndácuìsì ni cúníhnú ini-ndà, te chin-deámàndó) na ian chindéé cinturón ndee nuhní tìxi soldadu (ñà-coo fuerza-te). Daaní, xiñuhu quida-nda puru ñà-íá viì, te cunduumà na iin dùhnù cáa ndixí soldadu ñà-chindee xi nchìca-tè.

<sup>15</sup> Daaní, na ian mácùnàì soldadu ndisàn-tè (ñà-cacanuu-tè), ducán stná ndohó, ndiá ìcà-ndà cunihnu ini-ndà (cacanuu-nda xi) razón ndiaha nansa nàcùndoo vâha-nda xi Dios.

<sup>16</sup> Cunaha-nsiá (fuerte gà cuní ñà-malu dacà-síndô), na ian dandiachi-sí cuàhà flecha xíxìn ìcà-ndà; doco nú iin-ni nihnú vâha ini-ndà mii-yá, dandu chindéâmàndó na ian ni cúnduá iin

ñà-sicàtè caxin (ñà-màsà cuída flecha mà-ndó).

<sup>17</sup> Daaní, nahi mbelú cãa soldadu, ducán nduú stná ñà-nìhnú ini-ndà ñà-sà-lá salvación xi-nda; daaní, nahi espada xi-nda nduú stná palabra ìì nì cachi Dios, vèchi divi palabra mà nduá xichúûn Espíritu Ìì xí-yá.

<sup>18</sup> Daaní, nicanicuahàn xiñuhu càcàn tàhvì-ndà nùù-yá nacua datnúù Espíritu Ìì xí-yá ini-ndà. Càcàn-ndà nùù-yá nsidaa ñà-nduá xiñuhu, te iin-ni nì cúndóó tùha stná-ndà. Màsà cúdúsán-ndá càcàn tàhvì-ndà nùù-yá, còó. Xiñuhu càcàn tàhvì-ndà ñà-chindee-yá nsidanicuú ana nduú nèhivì xí-yá.

<sup>19</sup> Daaní, sàhà stná yùhù nì càcàn tàhvì stná-nsià sàhà-ñá chindee-yá yùhù na càhìn xì nèhivì, te màsà dáyûhîa yùhù càhìn sàhà razón ndiaha xí-yá, divi razón nîsa là dèhé sàhana.

<sup>20</sup> Cunaha-nsiá, divi sàhà-ñá nì cuítià palabra mà, ñàyùcànduá nì techuún Dios yùhù ñà-cacaniu, te divi sàhà stná mà ié`vehecãa yohó. Ñàyùcànduá, càcàn tàhvì-nsiá sàhí sàhà-ñá màsà yúhî`càhàn vatí palabra mà nacua ndiá ìqué.

*Nansa nì dàxînu Pablo carta xi-ne, cásàhú-nè xì nsidaa nèhivì ñîuu Éfeso*

<sup>21</sup> Yùhù cunî`cundaà inì-nsia nansa yáhi xì nansa quidé yohó; ñàyùcànduá sàni càhìn xì ñani màni-ndà Tíquico yohó, áma nacani-ne xì-nsiá nsi-daájàn. Te cunaha-nsiá, cuahà gá sàni chindee stná nècuàchìmà yùhù. Iin-ni quidá víi stná-nè nsidaa chuun xi Stoho-ndà Señor.

<sup>22</sup> Pues vichì cuahìn techuín-nè sàà-nè ndé ndoó-nsiá, dandu vètùni cachitnùhu-ne nansa yáha-nsi yohó sàhá màsà cúhúún gá ini-nsià.

<sup>23</sup> Vichi ndácùcahín Stoho-ndà Jesucristu, te xícàn tàhví nùù Yua-nda Dios sàhà-nsiá, ñánì. Xícàn tàhví ñà-nì cúndóó ví-nsiá, te ni cúcúú stnahá stná ini-nsià sàhà-nsiá; te nicanicuahàn ni cúníhnú vaha inì-nsia mii-yá.

<sup>24</sup> Te vichi ni cúcúmí cuáhà-nsiá gracia xi Stoho-ndà Jesucristu, nú ndisa iin-ni cuú ini-nsià sàhà-yá nicanicuahàn. Amén.

**Ley saa ni nacao Jesucristu**  
**New Testament in Mixtec, Southern Puebla**  
**(MX:mit:Mixtec, Southern Puebla)**

copyright © 1978 Wycliffe Bible Translators, Inc.

Language: (Mixtec, Southern Puebla)

Translation by: Wycliffe Bible Translators, Inc.

Mixteco, Sur de Puebla [mit], Mexico

**Copyright Information**

© 1978, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Southern Puebla

**© 1978, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-21

---

PDF generated using Haiola and XeLaTeX on 18 Apr 2025 from source files  
dated 29 Jan 2022

8a6c83d1-922b-5d25-99ec-4724168f3b77